

四庫全書

子部

欽定四庫全書

子部

冊府元龜卷三百一
三

詳校官中書臣王鵬

員外郎臣牛稔文覆勘

總校官庶吉士臣何思鈞

校對官助教臣羅萬選

謄錄監生臣郭坦

欽定四庫全書

冊府元龜卷三百一十一

宋 王欽若等 撰

外戚部

封拜

夫正位据體周官貴內治之教綏族展親良史稱外助
之義三代已降后妃之家或藉長樂之親或因椒房之
寵重侯累爵席寵連封或一門二主或同族五侯分食
名城預聞邦政車服之制名器之重寢或踰焉西京呂

王之勢東都梁竇之權不反三隅同歸一貫俾上徵不當之譏下免無功之誚惟明聖能焉

申伯周宣王元舅也為邑於謝

因是故謝邑之人而為國也

紀侯者周桓王納后於紀紀季子爵故先襄為侯

漢呂公高帝元年以后父賜號臨泗侯

呂澤以后兄封周呂侯

呂釋之以后兄封建成侯

呂則以孝惠二年嗣建成侯

呂台嗣周呂侯澤以高祖九年更封為郈侯高后元年
為呂王

呂嘉以高后三年嗣台為王

呂通嘉弟高后六年封脛侯八年為燕王

呂卮匹履切通弟以高后八年封東平侯

呂產台弟以高后元年封汝侯六年為呂王七年為梁
王

呂種建成侯則弟以高后元年封奉呂宣國王七年更

封不其侯

呂祿種弟高后元年封漢陽侯八年為趙王

呂平以惠帝皇太后姊長姁子元年四月丙寅封扶柳侯

呂勝以皇太后昆弟子七年封贅其侯

呂忿以皇太后昆弟子八年封呂成侯

呂營以皇太后昆弟子八年封祝茲侯

薄昭薄太后弟文帝舅也元年封軹侯

駟鈞以齊王舅封鄔侯

趙兼以淮南王舅封周陽侯

竇廣國以景帝皇太后弟封章武侯

竇彭祖以皇太后兄子封南皮侯

竇嬰以皇太后昆弟子以破吳楚封魏其侯

王信以景帝皇后兄封蓋侯

田蚡以武帝皇太后同母弟封武安侯

田勝以皇太后同母弟封周陽侯

衛青以武帝衛皇后弟封長平侯青三子在襁褓中皆

為列侯

仇為宜春侯不疑為
陰安侯登為發干侯

霍去病以衛皇后姊子亦以軍功為冠軍侯

李廣利武帝李夫人之兄夫人蚤卒帝以廣利為貳師
將軍延年為協律都尉

上官安以昭帝皇后父為驃騎將軍封桑樂侯

許廣漢以宣帝皇太子外祖父封昌成君霍氏誅許后
子立為皇太子乃封平恩侯

王無故以宣帝舅為關內侯封平昌侯

王武以帝舅為關內侯封昌樂侯

王奉光以皇后父為關內侯封印成侯

王舜以皇太后兄為侍中中郎將封安平侯

史高以悼皇考舅子侍中關內侯封樂陵侯

史曾以悼皇考舅為侍中中郎將關內侯封將陵侯

史玄以悼皇考舅子侍中中郎將關內侯封平臺侯

許舜以皇太子外祖父同產弟長樂衛尉封博望侯

許延壽以皇太子外祖父同產弟侍中闕內侯封樂成侯

王禁以元帝皇后父封陽平侯

王崇以成帝皇太后母弟散騎光祿大夫闕內侯封安成侯

王譚以皇太后弟闕內侯封平阿侯

王商以皇太后弟闕內侯封成都侯

王立以皇太后弟闕內侯封紅陽侯

王根以皇太后弟關內侯封曲陽侯

王逢時以皇太后弟關內侯封高平侯

王莽以帝舅曼子封新都侯

王莽為射聲校尉久之叔父成都侯高上書願分邑

以封莽及長樂少府戴崇侍中金涉胡騎校尉箕闔上谷都尉陽並中郎陳湯皆當世名臣咸為莽言帝由是賢莽永始元年封莽為新都侯國南陽新野之都鄉千五百戶

王音以皇太后從弟為大司馬車騎將軍錄尚書事音既以從舅越親用事小心親職詔曰車騎將軍音宿衛忠正勤勞國家前為御史大夫以外親宜典兵馬入為

將軍不獲宰相之封朕甚慊焉其封音為安陽侯食邑與五侯等俱三千戶

趙臨以婕妤趙氏父封為陽城侯

王欽以皇太后弟封新城侯

淳于長以侍中衛尉封定陵侯

馮參以中山王舅封宜鄉侯

丁明以哀帝舅封陽安侯

傅晏以皇后父封孔鄉侯

丁滿以帝舅封平周侯

傅喜以帝祖母皇太后從父弟大司馬封高武侯

傅商以皇太后從父弟封汝昌侯

鄭業以皇太后同母弟子封陽新侯

衛寶平帝之舅平帝為成帝後賜寶之弟玄爵關內侯
後漢樊宏光武之舅建武五年封長羅侯十三年封弟
丹為射陽侯兄子尋五鄉侯族兄忠更父侯十五年定
封宏壽張侯宏卒子儵嗣又封宏少子茂為平望侯樊

氏侯者凡五國

鄧晨娶光武姊元光武即位封晨房子侯帝又感悼元
沒於亂兵追封晨長子況為吳房侯以奉公主之祀

郭况光武郭后之弟小心謹慎年始十六拜黃門侍郎

封綿蠻侯后廢為中山太后進封况大國為陽安侯

陽安

縣屬汝南郡故城今豫州
朗山縣故道國城是也

后從兄竟以騎都尉從征伐

有功封為新鄴侯官至東海相

新鄴縣屬汝南郡故城
今在潁州汝陰縣西北

鄴丘城是也
鄴音七私切

竟弟正為發干侯

發干縣屬東郡故城在
今博州堂邑縣西南

官至太中大夫后叔父梁早終無子其壻南陽陳茂以

恩澤封南蠻侯

蠻音力
全切

竟子嵩孫駿並坐楚王英事失

國章帝建初中詔封嵩子勤伊亭侯駿觀都侯

陰識光烈皇后之兄更始二年始封識陰德侯建武

二年光武以后為貴人遣使迎貴人於新野并徵識

隨貴人至以為騎都尉更封陰鄉侯十五年定封原鹿

侯

許昌楚王英舅子英明帝之弟帝為太子時英常獨歸

附太子太子特親愛之及即位數受賞賜特封昌龍舒侯

秦彭同產女弟永平中入宮掖度為貴人有寵彭以貴人兄隨四姓小侯擢為開陽城門侯

馬廖明德皇后兄也章帝即位欲封諸舅明德馬太后不聽建初四年天下豐稔方陸無事帝遂封三舅廖防光為列侯並辭讓願就闕內侯太后聞之曰聖人設教各有其方知人情性莫能齊也吾少壯時但慕竹帛志

不顧命今雖已老而復戒之在得故日夜惕厲思自降
損居不求安食不念飽冀乘此道不負先帝所以化導
兄弟共同斯志欲令瞑目之日無所復恨何意老志復
不從哉萬年之日長恨矣廖等不得已受封爵而退位

歸第

又云有司連據舊典奏封廖等累讓不得已建初

四年廖封順陽侯防封潁陽侯光封許侯俱以特
進就事永光四年廖卒子遵嗣徙封程鄉侯無子國除
元初三年鄧太后詔封廖孫度潁陽侯防後徙封翟鄉
侯永初七年詔封
光子明郟鄉侯

陰棠梁王暢舅陰貴人之族章帝建初二年封西陵侯

竇憲章帝建初二年女弟立為皇后拜憲為郎稍遷侍中虎賁中郎將弟篤黃門侍郎兄弟親幸並侍宮省和帝即位太后臨朝會南單于請兵北伐拜憲車騎將軍金印紫綬督兵出塞大破北單于詔使中郎將即五原拜憲大將軍封武陽侯邑二萬戶憲因辭封許之明年詔曰大將軍憲前歲出征克滅北狄朝加封賞固讓不受舅氏舊典並蒙爵土

西漢故事帝舅皆封侯

其封憲冠軍侯邑

二萬戶篤郎侯景汝陽侯瓌夏陽侯各六千戶憲獨不

受封

鄧騭女弟為和帝貴人兄弟皆除郎中貴人立為皇后
騭三遷虎賁中郎將京惺弘閭皆黃門侍郎京卒於官
延平元年拜騭車騎將軍儀同三司惺虎賁中郎將弘
閭皆侍中安帝永初元年封騭上蔡侯惺葉侯弘西平侯
閭西華侯食邑各萬戶獨騭以定策功增邑三千戶騭
等辭遂逃避使者間關詣闕陳乞太后不聽騭頻上疏
至六乃許之弘以治歐陽尚書授帝禁中病卒詔鴻臚

持節即弘殯封子廣德為西平侯後以帝師之重分西平之都鄉封廣德弟甫德為都鄉侯四年又封京子黃門侍郎珍為安陽侯五年悝闇相繼並卒遺言薄葬不受爵贈太后並從之乃封悝子廣宗為葉侯闇子忠西為華侯建光元年太后崩未及大斂帝復申前命封隲為上蔡侯位特進後禹曾孫香子女為桓帝后帝又紹封隲從弟故度遼將軍導子萬世南鄉侯拜河南尹閻暢為侍中安帝元初元年帝選其女入掖庭二年立

為皇后三年暢以父后為長水校尉封北春侯食邑四千戶暢卒子顯嗣及安帝親政事顯及弟景耀晏並為卿校典禁兵延光元年更封顯長社縣侯食邑三千五百戶顯景諸子年皆童叢並為黃門侍郎

梁竦有三男三女章帝納其二女皆為貴人生和帝竇皇后養以為子竇氏譖殺二貴人而竦死獄中家徙九真竇憲敗還竦妻子封子棠樂平侯雍乘氏侯翟單父侯邑各五千戶諸梁内外以親疎補郎謁者棠官至

大鴻臚雍少府

宋楊女為章帝貴人安帝之祖母安帝即位封楊四子皆為列侯食邑各五千戶宋氏為卿校侍中大夫謁者郎吏十餘人孝德后異母弟次及達生人諸子九人皆為清河國郎中

梁商少以外戚拜郎中順帝永建元年襲父雍封乘氏侯三年順帝選商女及妹入掖庭遷侍中屯騎校尉陽嘉元年女立為皇后妹為貴人加商位特進更增國土

二年封子冀為襄邑侯商讓不受三年以商為大將軍
固稱疾不起使太常桓焉奉策就第即拜乃起詣闕受
命商薨子冀嗣及商葬拜冀大將軍弟侍中不疑河南
尹桓帝立建和元年益封冀一萬三千戶又封不疑弟
蒙西平侯冀子喬襄邑侯各萬戶和平元年重增封冀
萬戶并前所襲合三萬戶永興二年又封不疑子馬穎
陰侯喬子桃城父侯

鄧香女桓帝永興中入掖庭為采女明年封兄鄧演為

南頓侯位特進演薨子康嗣及后為皇后乃追封贈香
車騎將軍安陽侯更封康泚陽侯弟統襲母昆陽君宣
封昆陽侯統從兄會襲安陽侯統弟秉涇陽侯宗族皆
列郎將

竇武長女桓帝時選入掖庭桓帝以為貴人拜武郎中
其冬貴人立為皇后遷越騎校尉封槐里侯後從武興
太后定策立靈帝拜武大將軍靈帝立論定策功更封
武為閭喜侯子機涇陽侯拜侍中兄子紹郟侯遷步兵校

尉紹弟靖西鄉侯為侍中監羽林左騎

宋鄴女靈帝建寧三年選入掖庭為貴人明年立為皇后父鄴執金吾封不其鄉侯

何進異母女弟靈帝時選入掖庭為貴人有寵於帝拜進郎中再遷潁川太守光和二年貴人立為皇后徵進入拜侍中將作大匠河南尹中平元年進以發張角別黨馬元義謀封慎侯弟河南尹苗以破滎陽羣賊功封濟陽侯

魏下秉武宣后弟初以功封都鄉侯黃初七年進封開陽侯邑千二百戶為昭烈將軍秉卒蘭嗣蘭卒分秉爵封蘭弟琳列侯蘭子隆女為高貴鄉公后隆以后父為光祿大夫位特進封睢陽鄉侯

甄逸女文帝納之於鄴明帝太和元年二月以中山魏昌之安城鄉戶千追封逸謚曰敬侯適孫像襲爵為射聲校尉青龍中薨改封魏昌縣謚曰貞侯子暢嗣又封暢弟溫韡為列侯又封后從兄子毅及像弟三人皆

為列侯嘉平中復封暢子二人為列侯

郭表文德皇后蚤喪兄弟以從兄表繼父永後后立表為奉車都尉明帝太和四年詔封表安陽亭侯又進爵鄉侯增邑并前五百戶以表子詳為騎都尉後明帝進表爵為觀津侯增戶五百并前千戶遷詳為駙馬都尉表卒詳嗣又分表爵封詳弟述為列侯

毛嘉女黃初中選入東宮明帝太和中立為后父嘉拜騎都尉后弟曾郎中又進嘉奉車都尉曾騎都尉頃之

封嘉博平鄉侯後又加嘉位特進曾散騎侍郎

郭立兄女明元郭后明帝即位拜為夫人以立為騎都

尉從父芝為虎賁中郎將齊王即位尊為皇太后追封

父滿西都定侯以立子建紹其爵封芝遷散騎常侍長

水校尉立宣德將軍昏封列侯建兄德出養甄氏德及

建俱為鎮護將軍昏封列侯並掌宿衛

魏略又云諸郭之中芝最壯直

先時自以

功封侯

張緝為東莞太守齊王芳嘉平中女為皇后徵拜光祿

大夫位特進

蜀吳壹先主定益州聘壹妹章武元年立為皇后壹官
至車騎將軍封縣侯

吳吳景孫堅吳夫人兄常隨堅征伐有功拜騎都尉孫
策以為丹陽太守揚武將軍景卒官子奮授兵為將封
新亭侯

謝承大帝謝夫人弟夫人卒後十餘年拜五官郎中稍
遷至武陵太守

王盧九女為孫權夫人生孫和和子皓立封其三弟皆
列侯

王文雍大帝王夫人同母弟夫人生景帝景帝即位王
氏無後封文雍亭侯

譚紹大帝潘夫人姊婿孫亮即位以為騎都尉

全尚女為孫亮夫人亮為嗣以尚為城門校尉都亭侯代
滕胤為太常衛將軍進封永平侯錄尚書事時全氏侯
者五人並典兵馬

何遂女為孫和姬和子皓立尊為皇太后封其弟洪永
平侯蔣溧陽侯植宣城侯洪子邈為武陵監軍

滕牧女為孫皓夫人皓即位封牧商密侯拜衛將軍錄
尚書事

晉羊琇景獻羊后之從父弟少與武帝甚深親狎帝即
位擢琇左衛將軍封甘露亭侯

王愷文明后弟少有才力歷位清顯雖無細行有在公
之稱以討楊駿勲封山都縣公邑千八百戶遷龍驤將

軍加散騎常侍

王虔字恭祖文明后弟以功幹見稱累遷衛尉封安壽
亭侯拜平東將軍假節監青州諸軍事徵為光祿勳轉
尚書卒

楊駿武悼楊后之父歷驍騎鎮軍二府司馬後以后父
超居重位自鎮軍將軍遷車騎將軍封臨晉侯識者議
之曰夫封建諸侯所以藩屏王室后妃所以供養盛弘
內教后父始封而以臨晉為侯兆以亂矣駿後惠帝永

寧初詔曰舅氏失道宗族隕墜滑陽之思孔懷感傷其
以務亭侯楊超為奉朝請騎都尉以慰蓼莪之思焉

賈謚韓壽之子賈充養以為嗣謚繼佐命之後又賈后
專恣歷位散騎常侍後軍將軍充妻廣成君卒去職喪
未終起為秘書監掌國史尋轉侍中領秘書監如故謚
侍從惠帝幸宣武觀較獵諷尚書於會中召謚受拜誠
左右勿使人知於是衆疑其有異志

賈模充之從子預誅楊駿封平陽鄉侯賈后既預朝政

欲委信親黨拜模散騎常侍二日擢為侍中

郭彰賈后之從兄賈充妻待彰若同生歷散騎常侍尚書衛將軍封冠軍侯

羊玄之以惠皇后父初為尚書郎以后父拜光祿大夫特進爵為公

虞豫子胤元敬后弟初拜散騎常侍遷步兵校尉建寧末追贈豫官以胤襲爵平山侯

庾亮明穆皇后之兄也明帝即位以為中書監及王敦

舉兵加亮左衛將軍與諸將距錢鳳及沈充之走吳興也又假亮節都督東征諸軍事追充事平以功封永昌

縣開國公

褚裒康獻皇后父豫章太守康帝立徵拜侍中遷尚書以後父求出累為左將軍都督兗州徐州之琅琊軍事假節鎮金城康獻皇后臨朝有司以裒皇太后父議加不臣之禮拜侍中衛將軍錄尚書事持節都督如故

王蘊孝武定后之父為晉陵太守定后立以后父遷光

祿大夫領五兵尚書本州大中正封建昌縣侯蘊固辭
乃授都督京口諸軍事左將軍徐州刺史假節

宋路興之文帝路淑媛之父孝武即位尊淑媛為皇太
后大明四年太后弟子瓊之及弟休之茂之並居顯職
廢帝景和中以休之為黃門侍郎茂之左軍將軍並封
開國侯邑千戶明帝廢幼主欲悅太后之心乃下令以
休之為黃門侍郎領步兵校尉茂之為中書侍郎是時
明帝未即位故稱令

王偃孝武文穆皇后之父文帝元嘉末為散騎常侍右
衛將軍孝武即位以后父授光祿大夫領茂陽王師常
侍如故

梁王錫份之孫以親屬封永安侯

後魏賀訥道武帝之舅從道武平中原拜安遠將軍以
元舅甚見尊重

賀盧者訥之弟也亦從道武平中原以功賜爵遼西侯
劉羅臣宣穆皇后之兄也從道武平中原以前後勲賜

爵永安公

姚黃眉明元昭哀皇后之弟也黃眉本後秦姚興之子及姚泓滅黃眉間來歸國明元厚禮待之賜爵隴西公杜超密皇后之兄太武始光中思念舅氏以超為陽平公神麿三年以超行征南大將軍太宰進爵為王

杜道生者超之長子也賜爵城陽侯後為秦州刺史進爵河東公

杜鳳凰者道生之弟也襲父超爵加侍中特進

杜遺者超之從弟也超薨復授遺侍中安南將軍相州刺史入為內都官進爵廣平王

杜元寶者遺之長子也位為司空進爵京兆王

賀迷太武敬哀皇后之從父也皇后生景穆初后少孤父兄近親唯迷故蒙賜爵長鄉子

閻毘恭皇后之兄皇后生文成太安二年以毘為平北將軍賜爵河東公弟紇為寧北將軍零陵公其年並加侍中進爵為王毘征東將軍評錄尚書事紇征西將軍

中都大官自餘子弟賜爵為王者二人公五人侯六人子三人同時受拜所以崇隆舅氏

閻英者恭皇后前兄興安二年為散騎常侍鎮軍大將軍遼西公弟喜鎮軍大將軍帶方公太安初英為侍中征東大將軍太宰進爵為王喜左光祿大夫改封燕郡從兄泰為安東將軍朝鮮侯

馮熙文明太后之兄熙祖北燕主熙生於長安姑先入掖庭為太武左昭儀妹為文成皇帝后即文明太后也

使人訪知熙所在徵赴京師拜冠軍將軍賜爵肥如侯
尋進爵昌黎王獻文即位為太傅累拜內都大官孝文
即位文明太后臨朝帝承旨以熙為侍中太師中書監
領秘書事後以例降封京兆郡公熙子誕與孝文同歲
幼侍書學仍蒙親待拜征西大將軍南平王侍中誕弟
修侍中鎮北大將軍尚書東平公後罷庶姓王誕為侍
中都督中外諸軍中軍將軍特進改封長樂郡公誕拜
官孝文立於庭遙受其拜既訖還室修降為侯十六年

以誕為司徒帝既愛誕拜除官日親為制三讓表并啟
將拜又為其謝章尋加車騎大將軍太子太師誕長子
穆初襲熙爵避皇子愉封改封扶風郡公修弟津與孝
文廢后同產兄位黃門侍郎信都伯津同產弟風幼養
於宮文明太后特加愛念勅歲賜爵至北平王拜太子
中庶子出入禁闥孝文親政後恩寵稍衰降爵為侯

李峻字玲之梁國蒙縣人元皇后兄也父方叔宋文帝
時為濟陰太守文成遣間使喻之峻與五弟誕嶷雅白

水等前後歸京師拜峻鎮西將軍涇州刺史雅嶷誕等皆封公後進峻爵為王

李惠獻文思后之父也歷位散騎常侍征西大將軍秦益州刺史進爵為王

李道念惠從弟鳳之弟孝文太和十二年將爵舅氏詔訪存者而惠諸從以再罹孥戮難於應命唯道念敢先詣闕乃申后妹及鳳兄弟子女之存者於是賜鳳子安祖浮陽侯興祖安喜侯道念真定侯從弟寄生高邑子

皆加將軍後例降爵安祖等改侯為伯並去軍號興祖
累遷燕州刺史卒以兄安祖子侃晞為後襲先封南郡
王後以庶姓罷封改封博陵郡公

高肇文昭皇太后之兄也文昭皇后生宣武詔封父颺
嫡孫猛渤海公肇平原郡公肇弟顯澄城郡公三人同
日受封始宣武未與舅氏相接特拜爵及賜衣幘引見
肇顯于華林都亭皆甚惶懼舉動失儀數日之間富貴
赫奕未幾肇為尚書左僕射冀州大中正尚宣武姑高

平公主遷尚書令

于勁字鍾葵宣武納其女為后封太原郡公

于勁武畧以功臣子

又以功績位沃野鎮將賜爵宣昌子拜征虜將軍帝納其女為后封太原郡公

胡國珍字世玉其女以選入掖庭生孝明即靈太后也

孝明帝踐祚以國珍為光祿大夫靈太后臨朝加侍中

封安定郡公尚書任城王澄奏安定公宜出入禁中參

諮大務詔令入決萬機尋進位中書監儀同三司侍中

復加使持節都督雍州刺史驃騎大將軍開府靈太后

以國珍年老不欲令其在外且欲示以方面之榮竟不得遷司徒公侍中如故就家拜焉

李延晏僕射冲之長子孝莊即位以元舅之尊超授侍中太保封濮陽郡王

北齊婁昭武明皇后之母弟也昭之次子定遠少歷顯職外戚中偏為武成愛狎封臨淮郡王

婁獻昭之兄子無他器幹以外戚貴幸為瀛州刺史孝昭皇建初封東海郡王武成太寧初進位司空

胡長仁武成皇后長兄以內戚歷位尚書封臨淮郡王
左僕射尚書令及武成即位預參朝政封隴東郡王
胡君璧者長仁子也後主納長仁女為后君璧襲爵隴
東王君璧弟君璋及長仁弟長雍等前後七人並賜爵
楊騰文帝之舅也文帝即位為開府儀同三司

乙弗繪文帝皇后之兄帝即位為開府儀同三司侍中
監魏昌縣公又為吏部尚書

斛律光為左衛將軍先是武成納光第二女為太子妃

後主天統元年拜為皇后其年光轉大將軍

後周陳山提宣帝皇后之父也山提自大將軍為上柱

國封鄆國公

元晟元皇后之父也晟自開府為上柱國封齊國公

隋呂宋文帝之舅子襲爵齊郡公

獨孤陀字黎耶獻皇后之弟也高祖受禪拜上開府右

領軍衛將軍

蕭璟煬帝蕭后之兄也以外戚擢為尚衣奉御

蕭琮賜爵莒國公煬帝以皇后之故甚見親厚拜內史
令改封梁公

唐獨孤懷恩元貞皇后弟之子也懷恩幼時以獻皇后
之姪養於宮中後仕為鄜縣令高祖平京城授長安令
及受禪擢拜工部侍郎

竇德明太穆順聖皇后兄之孫也武德初拜考功郎中
從太宗擊王世充頻有戰功封顯武男

長孫敞太宗文德皇后之叔父也從平京城以功除將

作少監出為杞州刺史貞觀初坐賊免尋拜宗正卿及致仕加金紫光祿大夫封平原郡公

長孫操敞之從父弟也貞觀中歷洺州刺史益揚二州都督府長史高宗永徽初加金紫光祿大夫賜爵樂壽男

武承嗣則天皇后兄子也初后父士彘娶相里氏生元慶元爽則天立為皇后以元慶為宗正少卿元爽為殿中少監中宗嗣聖元年以承嗣為禮部尚書尋除太常

卿同中書門下三品則天垂拱中轉春官尚書依舊知政事載初元年代蘇良嗣為文昌左相同鳳閣鸞臺三品兼知內史事天授元年於東都創置武氏七廟於是封承嗣為魏王元慶子夏官尚書三思為梁王后從父兄子納言攸寧為建昌王太子通事舍人攸歸為九江王司禮卿重規為高平王左衛親府史郎將戴德為潁州王右衛將軍攸暨為千乘王司農卿懿宗為河內王左千牛中郎將嗣宗為臨川王左衛勳二府中郎將攸

宜為建安王尚乘直長攸望為會稽王太子通事舍人攸緒為安平王攸止為常安王又封承嗣男延基為南陽王延秀為淮陽王三思男宗烈為新安王后兄子承業男延暉為嗣陳王延祚為咸安王

韋溫中宗皇后之從父兄也神龍中累遷禮部尚書封魯國公弟滑左羽林大將軍封衛國公

竇希瑊者睿宗竇后之族也玄宗先天二年九月戊寅以光祿幽國公希瑊將作少府希球衛尉少卿希瓘各

食實封二百戶以舅氏特寵之也

吳湊章敬皇后之弟也肅宗上元中授湊襄城尉寶應二年始封拜外戚授皇后叔前宣城令吳令瑤為開府儀同三司太子家令封濮陽郡公郎將令瑜為開府儀同三司太子左諭德濟陽郡公皇后弟盛王府錄事參軍淑為開府儀同三司鴻臚少卿左清道率同正澄為開府儀同三司太子賓客襄城尉湊為開府儀同三司太子詹事並封濮陽郡公

沈房者代宗沈后之族子也后無近屬唯房為近德宗命為金吾將軍主沈氏之祀

獨孤卓者貞懿皇后之叔也大厯初后寵遇無雙以恩澤官其宗屬卓自太常少卿為少府監及后兄良佐為太子中允

王果者德宗昭德皇后父揚州大都督遇之子也果為眉州司馬甥姪拜官者二十餘人

郭釗憲宗懿安皇后兄元和十五年三月釗以檢校戶

部尚書兼司農卿遷為刑部尚書兼司農卿及右金吾大將軍銜加檢校工部尚書

郭銛者穆宗之李舅也長慶二年十月以殿中監遷為太子詹事充閑廐宮苑使

蕭洪以帝舅檢校太子賓客長慶二年十月遷太子洗馬

梁張歸霸者末帝德妃之父也歸霸子漢傑漢倫漢融皆以外戚之故咸居大任掌大權

後唐王萬榮者明宗淑妃之父也長興四年九月自銀
青光祿大夫檢校司空領韶州刺史又加檢校司徒使
持節華州諸軍事華州刺史充鎮國軍節度使華商等
州觀察處置等使

漢李洪建太后母弟也事高祖為牙將高祖即位累歷
軍校遙領防禦使史弘肇等被誅以洪建為權侍衛馬
步軍都虞候

張彥成潞州潞城人初隱帝娶其女特見親愛從平汴

維累加特進檢校太尉同州節度使隱帝即位就加同
平章事

冊府元龜卷三百一

欽定四庫全書

冊府元龜卷三百二

宋 王欽若等 撰

外戚部

委任

輔政

將兵

立功

委任

夫姻連戚屬任參國柄苟或瑚璉之奇器梁棟之偉材
國家於是寄以腹心誠以義殊瓜李大則利權兵政委
之弗疑小則近司要事冀其能忠其有出自寵私靡由

公授倚任太過尤悔亦多覆轍類基前世甚矣

漢許廣漢孝宣許后之父宣帝即位封平恩侯位特進

與侍中金安上等徑出入省中

又云宣帝收霍氏諸領胡越騎羽林及兩宮將

屯兵悉以所親信許史子弟代之許即廣漢史謂史良娣兄史恭諸子

史丹父高宣帝親母史良娣之兄子封樂陵侯丹自元

帝為太子時以父任為中庶子侍從十餘年元帝即位為

駙馬都尉侍中出常驂乘甚有寵帝以丹舊臣自是考外

屬親信之詔丹護太子家

後漢陰識光烈皇后前母兄也初為侍中封原鹿侯及
明帝立為皇太子識以守執金吾輔導東宮帝每巡郡
國識常留鎮守京師委以禁兵

馬嚴先徙北地明德皇后父援兄余之子仕郡督郵後
歸安陵永平十五年明德皇后勅使移居雒陽顯宗召
見嚴進對閑雅意甚異之有詔留仁壽闈與校書郎杜
撫班固等雜定建武注記常與宗室近親臨邑侯劉復
等論議政事甚見寵幸

吳吳奮大帝母吳夫人弟景子也景卒奮授兵為將封新亭侯帝征荊州拜奮吳郡都督以鎮東方

晉羊琇景獻皇后之從父弟武帝踐祚累遷中護軍加散騎常侍琇在職十三年典禁兵豫機密寵遇甚厚

南齊江柘姑為景后少為明帝所親愛如兄弟高宗輔政委以心腹爵林隆昌元年自正員郎補丹陽丞中書郎明帝為驃騎鎮東府以柘為諮議參軍

後梁王操字子高宣帝母龔太后之外弟性敦厚有籌

略博涉經史在公恪勤初為帝外兵叅軍親任亞於蔡
大寶

陳沈君高後主沈后父君理之弟有吏能以家門外戚
早居清顯宣帝太建元年東境大水百姓饑弊乃以君
高為貞威將軍吳令

後魏王建廣寧人也祖姑平文后生昭成皇帝伯祖豐
以帝舅貴重豐子支尚昭成女甚見親待建少尚公主
道武登國初為外朝大夫與和跋等十三人迭典庶事

參與計謀

賀泥獻明皇后之從昆弟子也天賜末京師草草泥出舉烽於安陽北賀蘭部人往赴之明元即位乃罷詔泥與元渾等八人拾遺左右

閻莊恭皇后兄毘之子也孝文太和中初立三長以莊為定戶籍大使甚有時譽

李侃晞思皇后之族子也為博陵郡公侃晞為莊帝所親幸拜散騎常侍嘗食典御帝之圖爾朱榮侃晞與魯

安等持刀於禁內殺榮

宇文測性沉密少篤學為司徒右長史尚宣武女陽平公主拜駙馬都尉及孝武疑齊神武詔測詣後周文帝密為之備還封廣川縣伯

北齊尉景從神武起兵信都神武入維留景鎮鄴尋進為公景妻常山君神武之姊也以勲戚每有軍事與庫狄干常被委重

鄭仲禮高祖嬖寵其姊也以親戚被昵擢帳內都督常

執弓刀出入隨從

胡長粲武成皇后之從祖兄少而敏悟以外戚起家給事中遷黃門侍郎後主踐祚長粲被勅與黃門馮子琮出入禁中專典敷奏

後周尉遲綱字婆羅蜀國公迴之弟也少孤與兄迴依託舅氏太祖西討闕隴迴綱與母昌樂大長公主留迴晉陽後方入闕從太祖征伐常陪侍帷幄出入臥內守隋元孝矩初仕周為司憲大夫高祖重其門地娶其女

為房陵王妃及高祖為丞相拜少冢宰進位柱國時房陵王鎮雒陽及高祖受禪立為皇太子令孝矩代鎮既而立其女為皇太子妃親禮彌厚俄拜壽州總管賜孝矩璽書曰楊越氛祲侵軼邊鄙爭桑興役不識大猷以公志存遠略今故鎮邊服懷柔以禮稱朕意焉

唐吳湊章敬皇后之弟也累轉左金吾衛大將軍湊小心謹慎智識周敏特承顧問偏見委信大厯中滑帥令狐彰汴帥田神功相次歿於理所時藩方兵驕乘戎帥

喪亡人情多梗代宗令湊銜命撫慰必委曲說諭所欲為之奏請皆得軍民和協帝重之

梁段凝開封人妹為太祖美人故委心腹開平四年五月授懷州刺史遷鄭州刺史監大軍於河上後末帝罷王彥章兵權以授凝以衆五萬營於高陵津

後唐孟知祥字保胤幼溫厚知書樂善武皇深器之以其弟克讓女妻之即瓊華長公主莊宗同光三年九月大舉伐蜀以郭崇韜為招討使奉辭之日崇韜奏曰臣

以非才謬當戎事若西川平定之後陛下擇帥如信厚
善謀事君有節則孟知祥有焉望以蜀帥授之冬蜀平
十二月制以知祥檢校太傅同平章事成都尹充劍南
西川節度副大使知節度事帝曰蜀土奢華富盛不異
吾宮以卿戚里忠賢故以相付卿其勉之

輔政

在昔三代蓋有外戚之助班固所稱其事詳矣秦漢已
降后妃之家或以才升或由親授以才則竇嬰將兵克

殄於多難以親則新莽輔政終滋於逆節然則內主機
密參決政治恭慎自居必有輔佐之益威福是作乃生
顛覆之虞賢者謙以成名驕者侈而撥咎前史具載歷
代明徵是知授以至公靡由私愛表其親遇之意敦以
忠良之規則其可保乎始終守乎富貴者也

漢田蚡景帝王皇后之同母弟武帝初即位蚡以舅封
為武安侯會丞相衛綰病免帝議置丞相太尉藉福說
蚡曰魏其侯貴久矣

魏其侯
甯嬰也

素天下士歸之今將軍初

興未如即帝以將軍為相必讓魏其魏其為相將軍必

為太尉太尉相尊等耳

言其尊貴
同一等也

有讓賢名蚡乃微言

太后風帝

風請
為諷

於是迺以竇嬰為丞相蚡為太尉

上官桀隴西上邽人孝昭皇后祖父也武帝疾病以霍
光為大將軍桀為左將軍皆受遺詔輔少主

許延壽孝宣皇后同產弟封樂成侯宣帝以延壽為大
司馬車騎將軍輔政

史高孝宣父悼皇考之舅子封樂陵侯宣帝疾病拜高

為大司馬車騎將軍領尚書事元帝襲尊號高輔政五年

王鳳孝元皇后昆弟孝成初即位以元舅侍中衛尉陽平侯為大司馬大將軍領尚書鳳輔政凡十一年

王音孝元皇后從父弟弘子陽朔三年秋大司馬王鳳疾帝數自臨問親執其手涕泣曰將軍如有不可言平

阿侯譚次將軍矣

不可言謂死也不斥言之譚鳳弟也

鳳頓首泣曰譚等

雖臣至親行皆奢侈無以率導百姓不如御史大夫音

謹敕

敕也

臣敢以死保之及鳳且死上疏謝帝復固薦

音自代音竟代鳳為大司馬驃騎將軍輔政八年

王商以孝元皇后弟封成都侯位特進代王音為大司

馬衛將軍輔政四歲病乞骸骨帝閔之更以為大將軍

王根以孝元皇后弟封曲陽侯為光祿勳商薨紅陽侯

立次當輔政有罪過帝廢立而用根為大司馬驃騎將

軍輔政五歲

許嘉孝成皇后父自元帝時為大司馬車騎將軍輔政

已八九年矣及成帝立復以元舅陽平侯王鳳為大司馬大將軍與嘉並輔政以為故事

傅喜哀帝祖母定陶傅太后從父弟代師丹為大司馬
輔政

後漢竇憲以章德皇后兄為侍中虎賁中郎將和帝即位太后臨朝憲以待中內幹機密

幹主也

出宣詔命初章

帝遺詔以憲弟篤為虎賁中郎將篤弟景璜並中常侍於是兄弟皆在親要之地

鄧騭以和熹皇后兄拜車騎將軍儀同三司始自騭也
騭弟悝嘗為虎賁中郎將弘閭皆為侍中太后與騭等
定策立安帝騭兄弟常出入禁中騭後為大將軍以母
新野君薨還第服闋詔喻騭還輔政固讓乃止

閻顯以安思皇后昆弟封長社縣侯太后臨朝以顯為
車騎將軍儀同三司

梁商以順烈皇后父為大將軍商自以戚屬居大位每
存謙虛於是京師翕然稱為良輔順帝委重焉

梁冀商之子為河南尹商薨未及葬順帝乃拜冀為大將軍冲帝始在襁褓太后臨朝詔冀與太傅趙峻太尉李固參錄尚書事

竇武以桓思皇后父為城門校尉靈帝立拜武為大將軍常居禁中

何進靈思皇后兄獻帝即位尊后為太后臨朝進與太傅袁隗輔政錄尚書事

吳滕胤尚大帝公主為太常與諸葛恪等俱受遺詔輔政

廢帝即位加衛將軍

晉楊駿以武悼皇后父自鎮軍將軍遷車騎將軍武帝疾篤后乃奏帝以駿輔政帝領之遺詔曰昔伊望作佐勳垂不朽周霍拜命名冠往代侍中車騎將軍行太子太保領前將軍楊駿經德履詰鑒識明遠毗翼二宮忠肅茂著宜正位上臺擬跡阿衡其以駿為太尉太子太傅假節都督中外諸軍事侍中錄尚書領前將軍如故惠帝即位進駿為太傅大都督假黃鉞錄朝政

褚裒以康獻皇后父除衛將軍領中書令裒以中書銓管不宜以姻戚居之固讓及太后臨朝有司以裒皇太后父議加不臣之禮拜侍中衛將軍錄尚書事裒以近戚懼獲譏嫌上疏固請居藩

後魏賀泥獻明皇后從弟之子也明元即位拾遺左右太武征赫連昌以功進爵為琅琊公軍國大議每參務焉

閻毗恭皇后兄文成太安中以毗為征東將軍評尚書

事所以隆崇舅氏

常英以文成保太后兄太安初為侍中征東大將軍太
宰三年領太師錄尚書事

馮熙以文明太后兄拜冠軍將軍又尚恭宗女博陵長
公主拜駙馬都尉獻文即位為太傅孝文初太后臨朝
帝乃承旨以熙為侍中太師中書監

高肇以文昭太后兄景明中錄尚書事又尚宣武姑高
平公主遷尚書令肇出自夷土時望輕之及在位居要

留心百揆孜孜無倦世咸謂之能高后既立愈見寵信
延昌初遷司徒

胡國珍孝明時以靈太后之父封安定郡公太后臨朝
尚書令任城王澄奏安定公宜出入禁中參預大務詔
屈公入決萬機尋進位中書監儀同三司詔與太師高
陽王雍太傅清河王懌太保廣平王懷入居門下同釐
庶政

李延寔以孝莊元舅之尊起授侍中太保延寔以保犯

祖諱抗表固辭改授太傅尋轉司徒公

北齊胡長粲武成皇后從祖兄為給事中黃門侍郎文
成即位與領軍婁定遠錄尚書趙彥深和士開高文遙
領軍綦連猛高阿那肱僕射唐邕同知朝政時人號為
八貴於後定遠文遙並出唐邕專典外兵綦連猛阿那
肱別總武任長粲常在左右兼宣詔令從幸晉陽後主
即位富於春秋庶事皆歸委粲盡心毗奉甚得名譽又
為侍中

唐高士廉太宗文德皇后之舅貞觀初拜侍中十年同
中書門下三品十二年拜尚書右僕射

長孫無忌文德皇后兄也少與太宗友善義軍渡河無
忌至長春宮謁見自是常從太宗征討及太宗即位拜
尚書右僕射或有密表稱無忌權寵過盛太宗以表示
無忌謂曰朕與卿君臣萬事無疑若各懷所聞而不言
則君臣之意為不通矣因詔百寮謂之曰朕今有子皆
幼無忌於朕實有大功今日委之猶如子也疏間親新

間舊謂之不順朕所不取也貞觀七年再拜司空固辭
不許又因高士廉奏曰臣幸居外戚恐招聖主私親之
誚敢以死請太宗曰朕之授官必擇才行若才不至縱
朕至親亦不虛授襄邑王神符是也若才有所適雖怨
讐而不棄魏徵等是也朕若以無忌為后之兄而私情
愛之當多遺子女金帛何須輒以天官授之蓋是取其
才耳無忌聰明鑒悟雅有武略公等並知所以委之台
鼎無忌又上表切讓太宗使謂之曰昔黃帝得力牧而

為五帝先夏禹得咎繇而為三王祖齊桓得管仲而為
五伯長朕自在藩邸公為腹心遂得廓清宇內君臨天下以
公功績才望允稱具瞻故授此官無宜多讓也

楊師道尚桂陽公主拜駙馬都尉貞觀中為太常卿魏
徵既辭樞近之職太宗乃擢授師道為侍中參預朝政
親待甚隆常在左右

竇德玄太穆皇后之從孫也歷官以恭勤著稱高宗時
為右相

韋溫以中宗韋庶人從父兄神龍中累遷禮部尚書景龍三年拜太子少保同中書門下三品

楊國忠以玄宗太真妃從祖兄累遷蜀郡都督府長史充劔南節度副大使知節度事代李林甫為右相兼吏部尚書集賢殿大學士太清太微宮使

韋保衡尚懿宗女同昌公主咸通十年自起居郎為翰林學士累遷兵部侍郎承旨不暮年以本官平章事

將兵

夫推轂受任握兵之要將帥之重邦家是賴乃有奮自
戚里委之師律以親篤肺腑之懿以賢當幕府之選莫
不執金鼓之政總鵠鷁之旅處則總司戎重出則恭行
討伐固有削平逆壘揚威絕漠作鎮於外屏翰王國者
矣其或倚任非當恩賞踰制自致滿溢或貽喪敗兩漢
之世傾軛繼軌豈止太盛而不知抑損固亦違道而自
底滅亡者哉

漢呂澤呂釋之皆高后兄從高祖征伐為列將

澤二子台產高后臨朝特為將將南北軍

釋之子祿高后病困以為上將軍居北軍

竇嬰字王孫孝文皇后從兄子孝景即位為詹事因病

免三年吳楚反帝察宗室諸竇無如嬰賢

宗室帝之同
姓親也諸竇

總謂帝外家也以吳楚之難
故欲用內外之親為將也

召入見固讓謝稱病不足

任帝曰天下方有急王孫寧可以讓邪乃拜嬰為大將

軍賜金千斤嬰守滎陽監齊趙兵七國破封為魏其侯

衛青孝武皇后之弟元光六年拜為車騎將軍擊匈奴

出上谷元朔元年復將三萬騎出鴈門明年復出雲中

西至高闕

山名一曰塞名在朔方之北

遂至於隴西五年春令青將

三萬騎出高闕還至塞天子使使者持大將軍印即軍

中拜青為大將軍諸將皆以兵屬立號而歸明年出定

襄斬首數千級而還

青七出擊匈奴捕首虜五萬餘級

霍去病衛皇后姊子再從大將軍為票姚校尉元狩三

年春為驃騎將軍將萬騎出隴西有功其夏去病與合

騎侯敖俱出北地明年復出定襄數有功

去病凡六出擊匈奴斬虜

首十一

萬餘級

李廣利武帝李夫人之兄大初元年為貳師將軍發屬

國六千騎及郡國惡少年數萬人以往期至貳師城取

善馬故號貳師將軍軍還入馬千餘疋伐宛再反

再反
猶今

言兩
回也

征和三年復將七萬騎出五原擊匈奴

王鳳孝元皇后弟成帝即位以元舅為大司馬大將軍

領尚書事鳳從弟音成帝時為御史大夫鳳薨以音為

大司馬車騎將軍音薨鳳弟商為大司馬衛將軍商薨

以弟根為大司馬驃騎將軍

後漢竇固尚光武女涅陽公主明帝即位拜中郎將監羽林士永平十五年帝欲遵武帝故事擊匈奴通西域以固明習邊事拜為奉車都尉以騎都尉耿忠為副謁者僕射耿秉為駙馬都尉秦彭為副皆置從事司馬並出屯涼州明年出酒泉塞至天山擊呼衍王斬首千餘級時諸將唯固有功明年復出玉門擊西域在邊數年羌胡服其恩信

馬嚴明德皇后從父兄永平末為將軍長史將北軍五

校士羽林禁兵三千人屯西河美稷

美稷縣名

衛護南單于聽

置司馬從事牧守謁敬同之將軍

竇憲章德皇后之兄和帝即位太后臨朝憲以侍中內

幹機密有罪懼誅

臣欽若等按後漢書憲遣客刺後都鄉侯暢也

自求擊匈奴

以贖死會南單于請兵北伐乃拜憲為車騎將軍金印

紫綬以執金吾耿秉為副發北軍五校黎陽雍營緣邊

十二郡騎士及羌胡兵出塞斬名王已下萬三千級降

者前後二十餘萬人詔使中郎將持節即五原拜憲大將軍明年將兵出鎮涼州以侍中鄧疊行征西將軍事為副至私渠北鞬海而還

鄧騭和熹皇后之兄延平元年拜車騎將軍永初元年涼部畔羌搖蕩西州朝廷憂之於是詔騭將左右羽林北軍五校士及諸部兵擊之遷大將軍

閻顯安思皇后之弟建光元年安帝始親政事顯及弟景耀晏並為卿校典禁兵及思皇后臨朝以顯為車騎

將軍

梁商順烈皇后之父陽嘉三年以商為大將軍固稱疾不起四年使太常桓焉奉策就第即拜商乃詣闕受命商子冀為河南尹商薨未及葬順帝乃拜冀為大將軍竇武桓思皇后之父靈帝即位拜武為大將軍

董重靈帝母孝仁皇后之兄子中平五年為驃騎將軍領兵千餘人

何進靈思皇后之兄中平元年黃巾賊張角等起以進

為大將軍率左右羽林五營士屯都亭修理器械以鎮京師五年靈帝講武於平樂觀下行陣三匝而還詔使進悉領兵屯於觀下進弟苗中平四年為河南尹滎陽賊數千人羣起攻燒羣縣殺中牟縣令詔使苗出擊之苗攻破羣賊平定而還詔遣使者迎於成臯拜苗為車騎將軍

魏甄像文昭后父逸之孫明帝時為散騎常侍青龍二年吳人寇揚州以像為伏波將軍持節監諸將東征

晉羊琇景獻皇后從父弟武帝踐祚累遷中護軍在職
十三年典禁兵寵遇甚厚

王虔文明皇后弟為東平將軍假節監青州諸軍事虔
子士文為右衛將軍南中郎將鎮許昌

楊駿武悼皇后父武帝時自鎮軍將軍遷車騎將軍太
康末假節都督中外諸軍事領前將軍置步兵三千人
騎千人惠帝即位進大都督假黃鉞

虞胤元敬皇后弟太寧末自步兵校尉轉右將軍與南

頓王宗俱為明帝所昵並典禁衛

庾亮明穆皇后之兄明帝時代王導為中書監及王敦
舉兵加亮左衛將軍與諸將距錢鳳及沈充之走吳興
也又假亮節都督東征諸軍事成帝即位蘇峻反復假
亮節都督征討諸軍事後鎮蕪湖頃之後將軍郭默據湓
口以叛亮表親征於是以前官加征討都督及石勒死
有開復中原之謀乃率大衆十萬據石頭城為諸軍聲
援

亮弟懌為左衛將軍以討蘇峻功封廣饒男後遷輔國
將軍假節鎮蕪湖

懌弟冰為吳國內史會蘇峻作逆以冰行奮武將軍距
峻別率張健於吳中冰擊走之後為車騎將軍及弟翼
當伐石季龍於是以本號除都督江荆寧益梁交廣七
州豫州之四郡軍事領江州刺史假節鎮武昌以為翼
援冰弟翼代亮為都督江荆司雍梁益六州諸軍事安
西將軍荊州刺史假節鎮武昌康帝即位翼率眾北伐

有衆四萬詔加都督征討軍事

褚裒康獻皇后父康帝時為尚書以后父苦求外出除
建威將軍江州刺史鎮平洲遷右將軍兖州刺史都督
兖州徐州之琅琊諸軍事假節鎮金城穆帝時假節鎮
京口及石季龍死裒上表請伐之即日戒嚴直指泗口
朝議以裒事任貴重不宜深入可先遣偏師裒重陳前
所遣前鋒督護王頤之等徑造彭城示以威信後遣督
護糜嶷進軍下邳賊即奔潰嶷率所領據其城池今宜

速發以成聲勢於是除征討大都督徐兗青揚豫五州
諸軍事裒率衆三萬徑進彭城河朔士庶歸降者以千
計裒撫納之甚得其歡心

王蘊孝武定皇后父定后立父封建昌縣侯固辭不拜
乃授都督京口諸軍事左將軍假節鎮於京口徵拜尚
書左僕射遷丹陽尹以姻戚不欲在內苦求外出復以
為都督浙江東五郡鎮軍將軍

宋徐達之尚高祖長女會稽公主為振威將軍彭城沛

二郡太守高祖諸子並幼以遠之姻戚將大任之欲先令立功及討司馬休之使統軍為前鋒配以精兵利器事剋當即授荊州休之遣魯宗之子軌擊破之於陣見害追贈中書侍郎

趙伯符孝穆皇后弟子也武帝時為寧遠將軍總領義徒以居宮城北每有火起及賊盜輒身貫甲冑助郡縣赴討帝甚嘉之

後魏賀泥道武母獻明皇后從父弟悅之子從太武征

赫連昌又征蠕蠕為別道將

杜超密皇后之兄尚南安長公主神麈三年乃以超行
征南大將軍鎮鄴

馮誕文明太后兄子尚孝文妹樂安長公主除侍中都
督中外諸軍事中軍將軍

高肇文昭太后之兄延昌初為司徒及大征蜀以肇為
大將軍都督諸軍為之節度與都督甄琛等二十餘人
俱面辭宣武於東堂親奉規略

北齊婁昭武明皇后之母弟為中軍大都督從神武破爾朱兆於廣阿兗州刺史樊子鵠反以昭為東道大都督討之

昭子叡以軍功為大司馬武成至河陽乃遣總偏師赴懸瓠

庫狄干尚神武妹樂陵長公主以親地見待自預勤王常總大衆威望之重為諸侯最

韓軌妹為神武所納生上黨王渙軌督中軍從破爾朱

兆於赤嶺嶺後為大司馬從文宣征蠕蠕

斛律光後主皇后父為大將軍天統末周將圍雒陽壘
絕糧道武平元年正月詔光率步騎三萬討之其冬光
又率步騎五萬於玉壁築華谷龍門二城二年率衆築
平隴衛壁統戎等鎮戍十有三所破周將韋孝寬於汾
水之北俘斬千計又率步騎五萬出平陽道攻姚襄白
亭城戍

後周李暉尚太祖女義安公主從駕西巡率公卿子弟

別為一軍

唐竇德明高祖太穆皇后兄之孫武德初拜考功郎中
從太宗擊王世充頻有戰功

武攸宜則天之姪萬歲通天元年九月為右武威衛大
將軍充清邊道行軍大總管以討契丹及軍發則天幸
白馬寺餞之

武懿宗則天伯父士逸之孫為左金吾衛大將軍萬歲
通天中契丹賊帥孫萬榮寇河上命懿宗為大總管討

之

後唐劉延皓末帝皇后之弟清泰初自樞密使出為鄴都留守

晉杜重威尚高祖妹宋國長公主天福初典禁軍二年張從賓搆亂處汜水高祖遣重威與佺益率衆破之遷侍衛親軍馬步軍副都指揮使及鎮州安重榮稱兵向闕命重威禦之開運元年加北面行營招討使

立功

外戚之助其來遠矣乃有居於母黨謂我舅者本乎肺腑之重旁及葭莩之餘其或志蘊精彊才推饒傑早登勇爵深暢武經在寵任以方深屬艱虞之斯在而能祇奉王命式遏亂略協贊義舉克著英謀用集厥勲允膺懋賞於以播盛烈於盟府振休聲於軍志非夫忠而能力者其何以臻是哉

漢竇嬰孝文皇后從兄子為詹事病免景帝三年吳楚反帝察宗室諸竇無如嬰賢乃拜大將軍守滎陽監齊

趙兵以破吳楚功封魏其侯

衛青姊為武帝后元光六年青為車騎將軍擊匈奴

出上谷青至籠城

籠讀與龍同

斬首虜數百級是後匈奴

仍侵犯邊元朔元年秋青復將三萬騎出鴈門斬首

虜數千明年復出雲中西至高關

高關山名一曰塞名在朔方之北

遂至於隴西捕首虜數千畜百餘萬走白羊樓煩王

遂取河南地為朔方郡五年春令青將三萬騎出高關

匈奴右賢王當青等兵以為漢兵不能至此飲酒醉

漢兵夜至圍右賢王右賢王驚夜逃獨與其愛妾一人騎數百馳潰圍北去漢輕騎校尉郭成等追數百里弗得得右賢裨王十餘人衆男女萬五千餘人畜數十百萬於是引兵而還拜青大將軍明年春青出定襄斬首數千級而還月餘復出定襄斬首虜萬餘人青為大將軍七出擊匈奴斬捕首虜五萬餘級一與單于戰收河南地置朔方郡封長平侯

霍去病以衛后姊子年十八為侍中再從大將軍大將

軍受詔予壯士為票姚校尉與輕勇騎八百直棄大將

軍數百里赴利斬捕首虜過當

去病捕虜二千二十八級得相國當戶斬單于

大父行籍若侯產捕季父羅姑比再冠軍乃封為冠軍侯

元狩三年春為驃騎將軍

將萬騎出隴西踰烏盭

山名

討邀濮

匈奴部落

涉狐奴

水名

歷五

王國轉戰六日過焉支山千有餘里合短兵鏖臯蘭下

殺折蘭王斬盧侯王

折蘭匈奴中姓也

全甲獲醜執渾邪王子

及相國都尉捷首虜八千九百六十級收休屠祭天金

人師率滅什七其夏去病與諸將出北地遂深入至祁

連山得單于單桓酋涂王及相國都尉以衆降下者二千五百人捷首虜三萬二百獲五王王母單于閼氏王子五十九人相國將軍當戶都尉六十三人其後率師征匈奴西域王渾邪王捷首酋八千餘級降異國之王三十二元狩四年春大將軍青與去病各五萬騎青出定襄去病出代郡青出塞千餘里捕斬首虜萬餘級遂至真顏山留一日而還去病出右北平二千餘里獲屯頭王韓王等三人將軍相國當戶都尉八十三人臨翰海

執訊獲醜七萬有四百四十三級

李廣利女弟為武帝夫人廣利為貳師將軍發屬國騎
及郡國惡少年以往期至貳師城取善馬貳師至輪臺
攻數日屠之西行至宛城兵到者三萬宛兵迎擊漢兵
漢兵射敗之宛兵走入保其城圍其城攻之四十餘日
宛貴人謀曰王母寡匿善馬殺漢使今殺王而出善馬
漢兵宜解即不廼力戰而死未晚也宛貴人皆以為然
共殺王其外城壞虜宛貴人勇將煎靡宛大恐走入城

中相與謀曰漢所為攻宛以王母寡持其頭遣人與貳師約曰漢無攻我我盡出善馬恣其所取而給漢軍糧貳師許宛之約宛乃出其馬令漢自擇之漢軍取其善馬數十匹中馬以下北牡三千餘匹而立宛貴人為宛王罷而引歸貳師將軍之東諸所過小國聞宛破皆使其子弟從入貢獻見天子因為質焉

後漢李通尚光武女弟寧平公主為將軍建武六年夏領破姦將軍侯進捕虜將軍王霸等十營擊漢中賊公

孫述遣兵赴救通等與戰於西城破之

馬防明德皇后之弟章帝即位稍遷城門校尉建初二
年金城隴西保塞羌皆叛拜防行車騎將軍以長水校
尉耿恭副將北軍五校兵及諸郡積射士三萬人擊之防
引兵與戰於索西破之羌豪布橋迫急將種人萬餘降
詔徵防還拜車騎將軍

竇固尚光武女涅陽公主累遷中郎將安帝時以明習
邊事為奉車都尉以騎都尉耿忠為副出屯涼州與忠

率酒泉敦煌張掖甲卒及盧水羌胡萬二千騎出酒泉
至天山擊呼衍王斬首千餘級呼衍王走追至蒲類海
留吏士屯伊吾盧城時駙馬都尉耿秉等絕漠六百餘
里至三木樓山騎都尉來苗等至匈奴河水上虜皆奔
走無所獲太僕祭彤度遼將軍吳棠等坐不至涿邪山免
為庶人諸將唯固有功加位特進明年復出玉門擊西
域固遂破白山降車師

竇憲女弟為章帝后及和帝即位太后臨朝時南單于

諸兵北伐乃拜憲車騎將軍金印紫綬官屬依司空

依准

也長史一人十石祿屬二十九人令史及御屬十二人以執金吾耿秉為副發北

軍五校

漢有南北軍中侯一人六百石掌臨五營見續漢志

黎陽雍營緣邊十二

郡騎士

光武中興以幽冀并州兵騎克定天下故於黎陽立營以謁者監之又曰扶風都尉部在雍縣

以涼州近羌數犯三輔將兵衛護園陵故俗稱雍營

及羌胡兵出塞明年憲與秉

各將四千騎及南匈奴左谷蠡王師子

師子其名也

萬騎出

朔方鷄鹿塞南單于屯屠河

屯屠河單于名也

將萬餘騎出滿

夷谷度遼將軍鄧鴻

鄧禹少子

及緣邊義從羌胡八千騎與

左賢王安國萬騎出柘陽塞

柘陽在五原郡

皆會涿邪山憲分

遣副校尉閻盤司馬耿夔耿譚將左谷蠡王師子右呼衍王

須訾等

呼衍其號因以為姓匈奴貴種也今呼延姓是其後須訾名也

精騎萬餘

與北單于戰於稽落山大破之虜衆奔潰單于遁走追

擊諸部遂臨私渠北鞬海

匈奴中海名也

斬名王已下萬三千

級獲生口馬牛羊橐駝百餘萬頭於是溫犢湏日逐溫吳

夫渠王柳鞬等八十一部率衆降者前後二十餘萬人

憲秉遂登燕然山出塞三千餘里刻石勒功紀漢威德

令班固作銘至和帝永元二年憲以北虜微弱遂欲滅之明年復遣右校尉耿夔司馬任尚趙博等將兵擊北虜於金微山大破之克獲甚衆北單于逃走不知所在

何進女弟為靈帝后中平元年黃巾賊起以進為大將軍屯都亭張角別黨馬元義謀起雒陽進發其姦以功封慎侯

何苗進弟也為河南尹禁陽賊數千人羣起攻燒郡縣殺中牟縣令詔使苗出擊之苗攻破羣賊平定而還詔

遣使者迎於成臯拜苗為車騎將軍封濟陽侯

吳吳景大帝母吳夫人弟也景常隨堅征伐有功拜騎都尉袁術表景領丹陽太守討故太守周昕遂據其郡孫策與孫河呂範依景合眾共討涇縣山賊祖郎郎敗走會景為劉繇所迫復北依術術以為督軍中郎將與孫賁共討樊能于糜於橫江又擊笮融薛禮於秣陵時策被創牛渚降賊復反景攻討盡禽之後討劉繇繇奔豫章策遣景賁到壽春報術術方與劉備爭徐州以景

為廣陵太守術後僭號策以書喻術術不納便絕江津
不與通使人告景景即委郡東歸策復以景為丹陽太
守漢遣議郎王誦音普銜命南行表景為揚武將軍領郡
如故

徐琨大帝姑子也琨少仕州郡漢末擾亂去吏隨堅征
伐有功拜偏將軍堅薨隨孫策討樊能于糜等於橫江
擊張英於當利口而船少欲駐軍更求琨母時在軍中
謂琨曰恐州家多發水軍來逆人則不利矣如何可駐邪

宜伐蘆葦以為泚佐船渡軍琨具啓策策即行之衆悉
俱濟遂破英擊走竿融劉繇事業克定策表琨領丹陽
太守會吳景委廣陵東歸復為丹陽太守琨以督軍中
郎將領兵從破蘆江太守李術封廣德侯遷平虜將軍
陳錢道戢字子韜高祖微時以從妹妻焉平盧子略於
廣州除濱江令高祖輔政遣道戢隨世祖平張彪於會
稽以功拜直閣將軍除員外散騎常侍假節東徐州刺
史封永安縣侯邑五百戶

後魏賀訥道武元舅從道武平中原拜安遠將軍訥弟
盧盧弟悅並以從平中原功盧賜爵遼西公悅賜爵鉅
鹿侯悅子泥從太武征赫連昌以功進爵為琅琊公
劉羅辰宣穆皇后之兄也從平中原以前後勲賜爵永
安公以軍功除征東將軍定州刺史

唐長孫敞文德順聖皇后之叔父也仕隋為左衛郎將
煬帝幸江都留敞守京城禁苑及義旗入關率子弟迎
謁於新豐從平京城以功除將作少監

柴紹晉州臨汾人高祖微時妻之以女即平陽公主也
武德元年累遷為左翊衛大將軍從太宗平薛舉破宋
金剛攻平王世充於雒陽禽竇建德於武牢轉右驍衛
大將軍吐谷渾與黨項俱來寇邊命紹討之紹見虜陣
不整密使精騎自後擊之虜大潰斬首五百餘級貞觀
元年擊梁師都於夏州平之

竇抗穆皇后從兄也左武侯大將軍領左右千牛備身
從太宗平薛舉勲居第一

竇德明太穆皇后兄之孫也武德初為考功郎中從太宗征王世充頻有戰功封顯武男

王仁皎玄宗王庶人之父也子守一與玄宗有舊及玄宗登極以清陽公主妻之從討蕭至忠岑義等有功自尚乘奉御遷殿中少監特封晉國公

竇覲昭成皇后族姪為房州刺史德宗興元元年討李懷光於河中詔覲以房州兵七百人屯郃陽賊平以功兼御史中丞同州刺史

冊府元龜卷三百二